

Erich Bolinius

E-Mail: Erich.Bolinus@t-online.de

**(Bericht über den BSV Kickers Emden - Sendung „Flutlicht“ auf Radio Ostfriesland
Donnerstag, 9.2.2012 18.05 Uhr auf 94.0 bzw. 87,7)**

Moin, leev Toehörers,
dat Spöl lesd Saterdag tegen Osterholz-Scharmbeck is ja utfallen, wall de Grund froren was. In Kiel hebben sük de Lü doran neet stört. Holstein hett dat Pokalspöl tegen Borussia Dortmund dörföhrt, ofwall de Bodden so hart as Beton was. Dortmunds Trainer Klopp hett sük dorover düchtig upregt. He meente, dat Spöl harr neet anfleit worden dürs. Nu will de DFB noch maal beraden, wat in so 'n Fall toe doen is. Man dat hett se för Jahren ok al maal maakt, as Werder Bremen tegen St. Pauli spölt hett un Miroslaw Klose sük domaals de Skuller broken hett un seß Week för Werder neet uplopen kunn. Bün gespannt, wo dat dit Maal utgeiht.

De Fröst hett ok Oostfreesland fast in de Greep. An Foetballspölen is in de komende Tied neet toe denken. De Foetballverband Neddersassen, de NFV, hett ok dat komende Spöl van Kickers Emden in Goslar ok al ofseggt. Dorum kann ik disse Week un in de komende Week keen Spölbericht geven.

Man so 'n bietje van Dit un Dat over Kickers kann ik vertellen.

Wall wi nett' bi de NFV sünd. De verstah ik nu overhoopt neet mehr. In de Statuten van de Verband steiht, dat bi Insolvenz van 'n Vereen, un dat sünd bither in de Oberliga Neddersassen Kickers Emden un Eendracht Nordhorn, de Mannskuppen ofstiegen. De Spölen, de noch ansett sünd, mutten dörföhrt worden. Man Punkten dorför kriggt keen een van de beid Mannskuppen, wenn se tegennanner spölen. För de Vereenen, de tegen Kickers of Nordhorn kann dat billiger worden, wenn se gaar neet antreden. Sovöl as ik weet, mutten se dann blot 'n Straaf van 175 Euro betahlen. Dat is 'n Bült minner Geld, as dat se alleen för 'n Bus na Emden betahlen mutten.

Nu lees ik vandaag in d' Bladd, dat de NFV sük wat anners overleggen will. De Grootfehtjers, de in de Landesliga spölen, hebben sük beschwert, wall in de lopende Saison bit toe 6 Mannschaften ut disse Liga dann ofstiegen mutten. Ik kann de Grootfehtjers verstahn. Se of de anner Mannschaften, de dordör ofstiegen mutten, könt ja nix dorvör, dat anner Vereenen in de Insolvenz gahn müssen. Aber nu de Statuten eenfach ännern, dat geiht ok neet, meen ik.

Na mien Menen harr dat so oflopen musst:

De Vereenen Kickers un Nordhorn stiegen of, aber de dree Punkten kriggt de Mannskupp, de dat Spöl wunnen hett of bi 'n Unentschieden 1 Punkt. Dat wass, meen ik, de recht Weg west. Aber, de hoog Heeren in Hannover weten dat ja beter.

Dat dat Präsidium van Kickers disse Week de Fans toe 'n Utspraak inladen hett, finn ik heel goed. Vandaag kann man in de oostfreeske Bladen alls nalesen, wat dor vertellt worden is. Dat sücht ja neet slecht ut, meen ik.

Un dat Kickers Emden ok 16 Spölers unner Verdrag hett un de A-Jögdspölers ok of un toe, wenn se keen Punktspöl hebben, inspringen wölen, is 'n heel goed Saak.

So, toe Schluss noch, bevör ik – so as alltied- 'n kört Foetballwitz vertell, da ik all Stammhörers van disse Sendung Floetlücht, besünners aber mien Fründ Ali Bloem ut Riepe, hartelk gröten. So nu de Foetballwitz:

„Een Störmer van Hertha BSC humpelt van d' Platz. Besörcht kummt hum Michel Skibbe integen un fraggt: „Slimm verletzt?“ De Spöler: „Nee, mien Been is inslappen!“ Skibbe: „Na goed, dann gah duschen!“ De Spöler: „Wieso? Ik hebb doch gaar neet sweet!“

So leev Toehörers van Radio Oostfreesland,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt netso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.